

ВЕЛИКИЙ МОЛЕБНЫЙ КАНОН

глас 8

Пресвятей Богородице¹

Песнь 1

Ирмос: Колесницегонителя фараона погрузи чудотвори иногда моисейский жезл, крестообразно поразив и разделив море, Израиля же беглеца пешеходца спасе, песнь Бóгови воспевающа.

Припев: Пресвятая Богородице, спаси нас.

Скорбных наведения обуревают смиренную мою душу, и напастей облацы мое покрывают сердце, Богоневестная: но, Свет рождающая Божественный и Превечный, возсияй мне свет радостный.

От безмерных нужд и скорбей, и от врагов лютых, и напастей житейских, избавься, Всепречистая, крепкою силою Твоею, воспеваю, величаю безмерную Твою милость и еже ко мне Твое утешение.

Слава: Ныне надеяся, к Твоему прибежищу заступлению крепкому, и к Твоему покрову вседушно притекох, и колена преклоняю, Владычице, и плачу и стению: не презри мене окайнного, христианом прибежище.

И ныне: Не умолчу вопити яснейше величия Твоя: аще бо не Ты, Отроковице, всегда предстояла еси, о мне молящи Сына Твоего, кто бы от толика бур и лютых бед избавил мя?

Песнь 3

Ирмос: Небеснаго круга Верхотворче, Господи, и Церкви Зиждителю, Ты мене утверди в любви Твоей, желаний краю, верных утверждение, Едине Человеколюбче.

Недоумевый от всех, болезненно зову Ти: предвари тепле предстательство, и Твою помощь даждь ми, рабу Твоему смиренному и окайнному, Твоего заступления ищущему тепле.

Удивила еси воистинну ныне на мне, Владычице, благодеяния Твоя, Отроковице, и милости Твоя. Темже славлю Тя и воспеваю и почитаю многое и безмерное смотрение Твое.

Слава: Буря мя обуревает напастей, Владычице, и скорбных треволнения погружают: но предваривши руку ми даждь помощи, тепле заступление и предстательство Твое.

И ныне: Истинную Богородицу исповедую, Владычице, Тя, смерти державу потребившую: яко бо оживляющая, от уз адовых к животу возвела еси мя, в землю текшаго.

Песнь 4

Ирмос: Ты моя крепость, Господи, Ты моя и сила, Ты мой Бог, Ты мое радование, не оставль недра Отца и нашу нищету посетив. Тем с пророком Аввакумом зову Ти: силе Твоей слава, Человеколюбче.

¹ Творение благочестивейшаго Царя Господина Феодора Дуки Ласкаря

И где прочее иное обрящу заступление? Камо прибегну? Где же и спасуся? Кую теплую возымам помощницу, скорбьми житейскими и бурями, увы, мне колеблему? На Тя Едину уповаю, и дерзаю, и хвалюся, и притекаю к покрову Твоему, спаси мя.

Реку сладкую милости Твоея, богатými дарми оросившую всеокаянную и смиренную душу мою, Всечистая, напастей, и скорбей пещию сожженную, величаю, проповедую и притекаю, к покрову Твоему, спаси мя.

Слава: Тя Чистую, Тя Деву и нескверную, Едину имам стену необоримую, прибежище, покров крепкий, оружие спасения, не презри мене блудного, надеждо ненадеемых, немощствующих помощи, оскорбляемых радости и заступление.

И ныне: Како изрещи Твоя по достоинству возмогу безмерныя щедроты, о Владычице, мою всегда душу, люте оскорбляемую, яко воды обышедшия? Но о, Твоего промысла и благодеяния, егоже безумно окаянный погубих!

Песнь 5

Ирмос: Вскую мя отринул еси от лица Твоего, Свете Незаходимый, и покрыла мя есть чуждая тьма окаяннаго? Но обрати мя и к свету заповедей Твоих пути моя направи, молюся.

Благодарно вопию Ти: радуйся, Мати Деве. Радуйся, Богоневесто. Радуйся, Божественный покрове. Радуйся, оружие и стено нерушимая. Радуйся, предстательство и помощи и спасение, иже к Тебе притекающим верою. (Дважды)

Слава: Ненавидящий мя всеу стрелы и мечи и ров уготовиша, и ищут всеокаяннаго моего тела исторгнути, и низвести в землю желают: но от сих, Чистая, предваривши, спаси мя.

И ныне: Кий Тебе дар принесу благодарения, за яже насладихся Твоих дарований, и Твоея безмерныя благостыни? Темже убо славлю, песнословлю, и величаю Твою неизреченную ко мне милость.

Песнь 6

Ирмос: Молитву пролию ко Господу, и Тому возвещу печали моя, яко зол душа моя исполнися, и живот мой аду приближися, и молюся яко Иона: от гли, Боже, возведи мя.

Облацы скорбных покрывша окаянную мою душу и сердце, и помрачение вводят мне, Отроковице: но, рождающая Свет неприступный, изжени сия далече дохновением Божественных молитв Твоея.

Утешение в скорбех вем, и недугов Врача Тя знаю, и всесовершенное сокрушение смерти, и реку живота неизчерпаемую, и всех сущих в напастех скорое и быстрое заступление.

Слава: Не скрываю глубины Твоея милости, и ток безмерных чудес, и источник приснотекущий воистину, яже ко мне милости Твоея, Владычице: но всем исповедую, и вопию, и проповедую, и вещаю.

И ныне: Обыдоша мя житейския бури, яко пчелы сот, Деве, и мое содержащая сердце уязвляют стрелы скорбей: но да обрящу Тя помощницу, и гонительницу, и избавительницу, Всепречистая.

Песнь 7

Ирмос: Отроцы еврейстии в пещи попраша пламень дерзновенно и на росу огонь положиша, вопиюще: благословен еси, Господи Боже, во веки.

Свет рождающая, Богородице, помраченна мя ноцию грехов просвети Ты, Света сущи приятелище чистое и непорочное: да любовью Тя славлю.

Покров буди и предстательство, и заступление, и похвала, Деве, обнаженну мне ныне всякия помощи, беспомощных сило и надеждо ненадеемых.

Слава: Всею душею и мыслию, и сердцем, и устнами Тя славлю, насладився Твоих великих дарований: но, о Твоея благостыни и безмерных Твоих чудес!

И ныне: Виждь милостивым оком Твоим, и посети озлобление, еже имам, и лютых напастей и вреда, и бед, и от искушений мя избави безмерною милостию Твоею.

Песнь 8

Ирмос: На горѣ святѣй прославльшася, и в купинѣ огнем Приснодѣвы Моисѣови тайну явльшаго, Господа пойте и превозносите во вся веки.

Благоутрѣбиа ради милости Твоея, Дѣво, не презри, Чистая, потопляемаго мене бурю житѣйских волн: но даждь ми руку помощи, утесняему озлобленными житѣйскими.

Обстояния и скорби и нужды обретоша мя Чистая, и напасти житѣйския, и искушения отсюду мя обыдоша: но предстани ми и заступи мя крепким Твоим покровом.

Слава: В бурях да обрящу Тя пристанище, в печалех радость и веселие, и в недужех скорую помощь, и в бедях избавительницу, и предстательницу во искушениях.

И ныне: Радуйся, Престолу огнеобразный Господень. Радуйся, Божественная и манноприемная Ручко. Радуйся, златый Светильниче, Свеще неугасимая. Радуйся, девам славо и матерем украшение и похвало.

Песнь 9

Ирмос: Ужасѣся о сем Небо, и земли удивилася концы, яко Бог явися человеком плотски, и чрево Твое бысть пространнейшее небес. Тем Тя Богородицу ангелов и человек чиновачалия величают.

К кому прибегну иному, Чистая? Где притеку прочее и спасуся? Камо иду? Кое же обрящу прибежище? Кое теплое заступление? Кую в скорбех помощницу? На Тя Едину уповаю, и о Тебе Единой хвалюся, и к Тебе, дерзая, прибегах.

Несть исчислити возможно величия Твоя Богоневесто, и глубину неиспытательну изрещи, паче ума чудес Твоих, совершенных выну, любовью Тя чтущим и верою поклоняющимся, яко воистинну Бога рождшей.

Слава: В песнях благодарных славословлю, и почитаю безмерную милость, и многую силу Твою всем исповедую, и благодеяния Твоя, яже истощила еси на мя, проповедую, величаю душею же и сердцем, и мыслию, и языком всегда.

И ныне: Моление мое прими убогое, и плача моего не презри, и слез, и стенания: но заступи мя, яко Благая, и прошения исполни: можеш бо вся, яко Всемощного Владыки Бога Мати, аще возмааеши¹ токмо моему окаянному смирению.

¹ Склонишься.